

# INUIT ATAQATIGIIT INATSIARTUNI



UPA2024/62

07.05.24

Edvard Nielsen Aronsen

**Meeqqat atuarianni qanoq ililluni eqqumiitsuliornermik atuartsinermik siuarsaanerup meeqqat atuariannik soqutiginarnerulersitsillunilu atuartut piginnaasaannik qaffassaasinnaanera kiisalu angusanik pitsaanerulersitsisinnaanera pillugu apeqquteqaat aallaavigalugu oqallisissiaq. Taamattaaq qanoq ililluni eqqumiitsuliornermik ingerlataqartut atuartsinermi annertunerusumik atorneqarsinnaanerat ilanngullugu.**

**Inatsisartunut ilaasortaq Peter Olsen, Inuit Ataqatigiit**

**Oqaaseqaat :**

Peter Olsen-ip Inuit Ataqatigiinniit piorsarsimassutikkut suliaqartortatta meeqqat atuarianni qanoq atorluarneqarsinnaaneri pillugit apeqquteqaat aallaavigalugu oqallisissiaa imaattumik Inuit Ataqatigiinninngaaniik oqaaseqarfigissuarput.

Inuit ataqatigiit eqqumiitsuliorneq piorsarsimassuserlu naleqarnerulersitsisutut isigaavut, nammineq kinaassuseqarnitsinnik paasinnittariaasitsinnut pingaaruteqarluinnartoq, inuiattut ataatsimoornerunissatsinnut nukittorsaaqataasoq. Eqqumiitsuliorneq piorsarsimassuserlu aamma aningaasasiornikkut pisuussutitut isigaarput, tassami piorsarsimassutsikkut uummaarissumik pisoqarfiunerani periarfissarpasuit suli tamakkiisumik iluaqutiginiarneqanngitsut Inuit Ataqatigiinniit isumaqarpugut.

Nuna naalagaaffinngornissamut ingerlasoq piorsarsimassutsikkut pisuussutimik inerisaanngikkuni kinaassusermi ilaanik katataqarsimassasoq isumaqarpunga,

# INUIT ATAQATIGIIT INATSIARTUNI



tassami piorsarsimassuserput inuiaat kikkuunitta ilisarnaattaasa pingaarutillit ilangingaat uanga nammineq isumaqarpunga.

Meeraangallarninnut utersaalaassaguma taamanikkut nukappiaqqat amerlanersaat ataatamisulli imminnut piniartunngortussatut isigisarput. Taamaammat taamanikkut pissusissamisuunnginnartutut atuarfimmi piniusiorneq soorlu qassusiorneq, qamusiorneq, anuliorneq allarpassuillu piniartup ulluinnarsiutai uatsinnut ilinniartitsissutigineqartarput, tamannalu aamma nuannersutut ullumimut eqqaamasarpara. Allaat aasakkut nukappiaqqat qajartuartinneqartarpugut qaannap qanoq piniutigineqartussaanera ilinniarlugu piniartunik ilinniartitsisoqarluta.

Uagut inuiaat qangaanerusoq aningaasaq kisiat isigalugu inuunngikkallaratta pinngortitaq inuuniarfigaarput. Ataatagut qanigisagullumi allat angalaqatigalugit pinngortitap qanoq issinnaanera ilinniarsimallugu pinngortitallu tunniussinnaasai inuussutigalugit. Qularinngilara anersaakkut tamanna taamanikkut nukittunerussutigigipput piorsarsimassutsikkullu pisuussutigut aamma uatsinnut nukiliuutitut atorluarlugit.

Inuk suli ullumikkornit nukittunerulluni inuussaguni kinaassutsini ilisimaaralugu inuussussaasoq uanga nammineerlunga isumaqarpunga. Taamaattumik uannga oqallisissiamik qaqitsisoq assortorfissaqartinngilara. Kinaassuserpummi aamma piorsarsimassutsikkut inuunermi nassaassaavoq. Kiinarpalioriaatsit nunatta kangiani, kalaallisuuliornerit, Inugguit atisalioriaasiat, qalipaalluni kusanartuliornerit, qiperuilluni kusanartuliornerit, erinniornerit taalliornerillu, atuakkiornerit allarpassuillu tassa kinaassutsitta ersiutaasa ilamininngui erligalugit tammatsaalisariaqakkagut tamakkualu aamma atuarfinni sammineqarsinnaasariaqartut Inuit Ataqatigiinniit isumaqarpugut.

Ullumikkut kusanartuliornerup iluani ilinniarsimasorpassuarnik peqarpugut sumiiffinni assigiinngitsuni atuartitsinerup iluani atorluarsinnaasatsinnik.

# INUIT ATAQATIGIIT INATSIARTUNI



Imaattariaqanngilaq eqqumiitsuliornermik ilinniarfimmi naammassiguni taamaallaat assilissanik qalipaasartunngussasoq nammineq tuniniagassaminik. Ilinniarsimasaasa inuiaqatigiinni qanoq atorluarneqarsinnaanerat ilanngullugu eqqartorsinnaasariaqarparput taamaalillutik ilisimasat pigilersimasai inuiaqatigiinnut utertillugit. Nalunngilarpummi eqqumiitsuliortut tamarmik namminneq ineriartortissimasaminnik immikkuullarissunik peqartartut inuiaqatigiit eqqumiitsuliornikkut ilisimasaqarnerulissutigisinnaasatsinnik, taakkualu aamma atorluarlugit siammasissumik eqqumiitsuliornikkut ineriartortitsinissami atuarfinni atorluarneqarsinnaappata annertuumik soqutigineqassasoq angusaqaataassasorlu Inuit Ataqatigiinniit isumaqarpugut.